



聖宋名賢五百家播芳大全文粹卷九十五

疊幅

上陳丞相小簡七幅

呂伯恭

秋令權輿餘暑尚劇共惟斟酌化源乾清坤晏幽明
協贊鈞候動止萬福某謹勒啟仰承記府

申詞寒溫之儀已布右方邇日不審鈞用何似恭惟
浩然之氣上際下蟠靈府虛明百嘉來舍更祈忠調
視履宣節雨暘仰符當亡倚注之隆俯徇四海依歸

之望

某最外之蹤屏伏閭巷與昆蟲草木共游坏治之中
涵泳泰和為日久矣具瞻之地禮絕百寮分有常尊
賤不可賣士有常守進不可輕用是不肖之姓名無
繇自達於典籤曠宇碩量細大并容草介之微當在
原貸

成均置屬本待名儒推擇之餘下及孱陋怵然內顧
業荒學淺且無一日之雅於門下果何以得此意者

大鈞播物不問遠邇推拔十得五之義故雖鈍頑猶
在甄獎深惟至公之舉本非私德而犬馬蛇雀導諛
之言亦非承學所當施於大君子也惟當博親師友
砥礪講習不辱於官無為化筆之羞而已拳拳之誠
有如皎日某尺牘以貢謝悃訪諸典彙厥有故常用
敢忘其蕪類致之几格尚覬鈞慈俯加采覽

某一介疏遠不敢僭布鈞閱之問若請諉令於黃扉
又適重不韙之罪俯伏陳露尚祈鈞察

上丞相小簡 八幅

汪彥章

秋高氣爽伏惟入侍帷幄關決政機六氣順迎百福
陰相某祇役遠方仰戴恩地未有趨拜塔祀之期下
情無任瞻戀伏乞以時調護寢興為宗社無彊之福
某向緣屬吏獲趨走右左寒鄉賤士平昔之望曷嘗
及此至榮至幸惟圖朝夕望塵以承謦效無何得罪
深重奔走漂零引領崇墉坐成霄壤展轉淮浙俯仰
半年雖銜恩戀德之誠無食息暫置其如身繫罪籍

不敢輒拜起居以故姓名迨今方徹門下而言語拙
訥所以控漉肺肝者又極於如此伏乞鈞慈俯賜矜
察

恭以某官勲業福祿之盛度越今古自生民以來未
有其比此固能言之士為天下後世道也然某以為
此持我公之細事惟身作太平之基壽考百年則民
有千年之澤壽考千年則民有無窮之澤由是言之
天下頌詠之情果何時而已哉不知當時崧高之頌

申伯闕宮之頌魯公果能如是否方今縉紳蒙德賜
以為適然耳當知數百歲之後悵然企慕者甚於崧
高闕宮之詩也况蒙收錄預門下諸生之列其欣何
如哉

恭以某官學貫九流身兼數器膺人主非常之寄極
縉紳甚盛之選四方喁喁倚俟柄用久矣伏計匪朝
伊夕顯冊一頒周公拜前魯公拜後盛事赫然追古
某以孤生猥被知獎其為傾禱倍百他人某得罪本

末伏計熟聞於左右者聽不當喋喋再有塵浼伏念
某學術迂淺自揣甚明緣出入門墻以來實不敢以
片言妄干進取昨者蒙恩權置東省修道史皆某官
特達之知假以恩地其本心何嘗及此而言者遽以
構造之罪上聞實為非意今謫佐偏州於某已為僥
冒然某蒙知遇本以薄技進身若緣口舌得官雖至
駑賤實深恥之今傳播四方長陷浮薄終身何以自
明伏乞鈞慈特與昭雪

某昨日承蒙某官驟賜收錄既修道史復遷東省自以為託迹宇下不啻泰山之安豈圖身迹疵賤反累恩地一朝倉卒禍出非意若非鴻造察其非辜假以仕祿則一家為壑中之瘠久矣每一思之不知涕之橫集也故到官以來朝夕惴恐莫知所以圖報惟有恪守官箴勤於簿領庶不玷門下之知伏祇西向不勝拳拳

恭以 聖上參萬世之紀成一代之史命師臣儒宗

董領其事其所辟置皆當時之選某頃以末學猥預甄收可謂不世之遇方幸朝夕執筆左右庶幾綴名編末垂示無窮亡何事有大謬不然者今而思之恍若夢寐窮薄所致夫復何言儻執事憫其無辜以前日嘗被使令特加採錄只作在京宮觀名目再陪英俊參侍硯席瞑目無恨矣伏乞鈞慈特賜留聽某寒鄉晚出無異能解自束髮志讀書屬文既登門墻屢蒙採錄益不敢怠方今朝廷極治之時人孰不

願操觚執簡以紀休烈如某荒拙辱獎成之久亦豈
多愧流輩伏乞鈞慈早賜收錄無使白首槁死與異
時數子同不遇之歎幸甚

某近者竊觀郎吏報宣德樓成寵賚輔臣恩數絕異
輝映今古雖周公營洛不過是也某不揆輒撰宣德
樓賦鋪張一時之盛擬繕寫投進又以隔阻遠方不
經目睹恐述作未盡儻因牽叙許過都一至其下畢
區區之志死不恨矣伏乞鈞慈特賜矜察

上丞相 七幅

毛伯穎

夏序敷榮景物清潤恭惟丹青神化為國棟梁勲績
之隆增光日月神所贊相鈞候動止萬福謹具啟承
候下執事

伏以聖主憂勤緝熙紹開統業某官弼亮帝室格于
皇天折衝綏遠之謀能使獫狫革心海寓清晏詩書
簡冊之意無與比侔仰冀為棟隆鼎飪之重保練冲
氣光輔基圖某下情無任傾頌

伏以方內又安邊隅不聳執迹夷陽庶尹允諧某官
鈞調燮理之功萬世永賴某廷孱樸邀無所短長備
員郡吏夙夜俯仰大化畏法遵繩無由操筭整襟奔
走於光範簪裾之末無任景慕

某材質朽下墊蹟卑冗馭於遠郡之繩墨辱在某官
坯陶簫勺之中整襟濯纓沉浸醲郁夙興夜寐未抵
譴訶豈不知幸惟是恪恭分守不敢時具竿牘冒昧
典記共惟大公樂育之度洞賜矜察

某頃嘗具不腆牋牘冒昧典記譬夫擊轅拊缶巴人
下里唐突清廟之奏率爾犯分何所逃罪某官方以
大賢全德嘉善矜愚雖涓微塵瑳下才末伎不賜剪
棄特垂酬答使得光華蒞室拳拳服膺以自砥礪於
寵綏之盛幸甚吳蜀萬里江湖悠邈陳謝迂緩伏深
慚罪

備員省山亦既一年有半雖稱大邦然軍須兵賦百
孔千瘡之後土壤堯堉民俗褊儉器訟盤互號為難

治孱懦書生無網絡張設之功汝苦食淡鞠躬履方
粗能日恪詔條未抵瘼曠伏惟大鈞坤北函容覆護
之德何以上酬

某政和二年塵忝名第沉淪州縣粗知奉法循理震
動恪恭紬繹於摩研編削之業建炎中誤蒙朝廷收
召造蹟文館遭淮甸之亂垂翅北歸仰賴清朝樂育
之仁三剖符竹年事荏苒舊殖將落伏遇某官以道
德文章輔弼明主論道經邦之暇尤加意於長育人

才是敢不因介紹不以未見顏色為歉飾固陋之說
自通於下執事儻蒙一賜觀采予而進之使遐陬裔
壤枯槁沉溺之士聞風而作鼓舞於執事之功業幸
甚

上丞相

汪彥章

庚伏在辰伏惟秉執事樞均福中外陰有神明來護
興寢某屏迹里閭無緣俯伏軒墀瞻望履舄下情依
戀以日為歲仰乞珍愛節宣上佐休明為宗社華夷

無疆之慶

某比者專差人上狀伏計已經鈞覽退惟疵賤不敢
數具起居取瀆尊之罪仰惟厚恩未賜誅絕茲者鈞
治一新中外呼舞雖小大賤隸皆得與觀班庭盛禮
某蒙恩地之久乃獨阻絕一隔無緣俯伏後塵伸悵
惓萬一北望台躔精爽飛越

某茲者伏審肆頒顯冊登用大賢居上相之尊兼一
品之貴華夷民物慶賴惟均共惟某官以道德為儒

宗以公忠持國是頃雖未授魁柄凡所建明無不卓
然上當帝意故體貌日隆至於絕等人人以為他日
居太平任職相者非公而誰是以詔音一出和氣隨
生蓋物望所歸不謀而合方將觀設施之盛與天壤
俱新不知伊尹周公並駕爭馳孰為先後也屬衣制
不敢具啟稱賀謹書輿人之頌如此伏乞鈞慈特賜
矜察

某窮悴山居罪釁深崇謂先狗馬填溝壑決矣今者

大賢當國至仁所被雖疎遠微賤之夫猶恐或失其所况趨走門闌之久受知不後衆人竊計奄然殘息必不大至漂零舉家慰幸勉奉大事以盡犬馬之誠如未隕越間尚期一望赤烏作為崧高烝民之詩稱頌元勳盛德未為晚也

上丞相小簡 八幅

馮當可

調元秉鈞道洽覆載天眷宗社鈞候動止萬福某即蒙生息大造之恩謹冒昧具狀上瀆仰惟天稟粹全

涵養充實神明所蘊妙參化元益祈與聖賢千載一時之遇保思康寧以副天人之所屬望

伏以某官道協天人德流夷夏仁義之澤薰為至和
大而山川鬼神莫不清寧微而鳥獸草木咸遂生殖
蓋干戈紛擾之日未遠皆天下所共見以古準今則
太平之象可得而言矣某廢黜有年荷鋤扶犁從事
田畝日與山夫谷民休息至化時和歲豐物無疵癘
故得不填溝壑以迄于今蒙被更生之恩由是贊論

功德出其誠悃不自以為諛伏望恕察

仰惟某官盛德大業高出前古天下士大夫蓋嘗探求其所以至而莫得其端倪但求端坐廟堂酬酢萬機以物處物各當其分退而燕私絕聲色貨利之欲薰香靜坐翫味簡素如山澤癯儒是其可得而聞者以能超古人之萬萬至於道心精微與天地同功其所感召有非人力所能致者則非庸常可得而測是故當求三代與周孔無間矣孔子弟子智知其師靈

山之徒贊頌佛祖某叨蒙大恩輒陳識者之意以見歸依之心

切以宮祠之典允謂優恩或年老孤高宜優其晚節或賢勞王事當錫以燕閒縱其甚寬宥及罪廢豈謂某官行孔門之恕寶老氏之慈一視同仁無間遠近雖如某罪累湮沒之久披拭滌洗之恩振其零丁亦叨此數拜命之日質之天地託之神明誓持銜戴之恩盡於縻損輒有啟事叙此悃隔顧其樸澁之辭安

能寫心

歲事戊午蒙被君恩獲至闕庭瞻望嚴崇之尊自此
忝叨郡符遂遠泰階繼以迂愚貽譴司察由是自絕
於造化生成之門姓名不登於記史蓋有十三年矣
其於鈞衡之重可謂至疎至遠仰惟某官廓如天地
以厚德深仁芻狗万物收茲微賤踈遠並蒙大恩振
其廢墜之蹤錫爾優閒之祿僥倖所期不謂至此雖
至道善貸漠然無心而微物受成如蒙私德欲伸銜

荷莫知所云

爰自束髮以來粗親紙筆積日滋久遂涉其流中年
公家罪私門釁撻拂心志舊業荒踈然虛華之氣以
憂患而盡銷盈虛之原由履歷以自見於是初窺六
經弛張之用竊見聖賢心術之蘊每恨以百指累心
未遑究業及今仰蒙大惠賜以無事之祿杜門却掃
優游卒歲誓當研精極思深伏長引薰此心香仰酬
造化如其不至猶是用心率以自陳伏紙戰汗

惟蜀不罹兵革民物全盛自近以來年穀婁豐今秋
又復大稔遐邇之俗薰陶大化鼓腹擊壤歌詠升平
仰惟生民休戚鈞慮所存故敢以耳目之所見聞之
於下執事僭率之罪莫知所逃

上丞相小簡

賀生長

孫太冲

杪冬協序歲律將新共惟雍容廊廟燕載惠疇天祐
神扶鈞履起居萬福某代匱邊隅仰承蔭樾末繇詹
望鈞墀謹具柔訥申候茵鼎

仰詞典書已列右牘邇來未審鈞履何如欽想翼宣
盛美上應天心戩穀川增百祥來舍春陽將屆氣令
正寒敢祝勉為基圖葆寧德宇以慰寰海黔黎之望
歲功將就氣節皆周留一候以示無窮存五莩而全
大數天於此時誕毓真儒鼎角匿犀骨瑩皓玉寶苞
虛曜之紀稟山岳之暉直其出應昌期輔隆聖緒中
興茂烈專美于今祿位之崇壽祺之永固自有昊天
默相非蠡測管見所能知其極也

某官梁楹重器金壁高標雅性內融英華外發故能
依光日月感會風雲勲紀旂常名書竹帛輔太平之
至治迓滋至之宏休荷眷益隆竭忠彌著既富伊周
之事業宜膺彭喬之年齡輿論所同愚情靡佞
恭以夢熊穀旦照社剛辰搢紳士民万口咸詠莫不
以椿歲八千廣成壽考仰祝遐齡蓋曲盛德洪恩漸
洽四海無一夫不被其賜則揄揚感戴有不約而同
者某素荷陶鎔尤深禱頌限拘官次不獲躬造府門

廁迹稱觴之列輒以星香末禮及斐文祝疏專人賫
納鈞廡以表區區之誠仰乞寬仁特賜鑒亮
比因亞歲令辰嘗偕具竿牘前玷鈞嚴想已獲塵記
史今茲恭遇誕慶之日不量疵賤又以緘討輕瀆威
尊極深戰悚伏覬鈞慈愍其勤劬而恕其率爾不勝
至幸

某迂鈍之資仰蒙挺埴得以效能小壘已過瓜期夙
宵勉勵幸免曠瘵舉族飽溫實由洪造誓當益罄駑

情以期報塞更期包舉提獎俾永安於薄分傾依感
刻交積卑悰

上丞相小簡 賀生辰

趙莊叔

成歲受春共惟天棊正人道尊德隆鈞候動止萬福
某被受大庇方遠墻仞敢祈嚴護威重永綏斯文某
下情真禱

僭候鈞崇粗謹公牘矣春律初回天地始交裁成輔
相春倚上宰仰惟以道消息戩穀畢臻更祈倍万節

宣順舍太和以副九重仰成重慰四海百世具瞻無
窮之願

恭惟皇上纘服聖德配天天實昨之卜世千億則有
光明碩大萬人之英應時而來勵相我國家昔武丁
中興帝賴良弼宣王中興岳降申甫此豈偶然哉無
疆惟休豈特一時賴之某疎賤率爾妄議上及天人
君相之際蓋師友宿昔之共論以為如此非某所私
臆也

共惟某官受天地間氣出佐興運曉然見秦漢以來
歷世之上陷溺未習隨宜補闕僅立一代之治實始
慨然收拾堯舜三代周孔之遺文盡發其祕起是道
於千載禮樂廢絕之後神功妙用無處不到大位天
地小育萬物聖天子知是其出於一也傑閣大書以
表中興天下皆得而測之曰君臣之除蓋如此豈非
真儒治效之極致聖宋無窮之盛烈也某敢誦言之
某讀書切嘗妄議以為人莫大於有我莫小於有物

有我之至至於無我孔子孟子之身相魯為齊卿當
時視之若一旅人然則有我之至也伏惟某官有大
勲勞於天下皇上念無以致其報備物典冊窮極尊
榮可謂盡天下之富貴矣而燕居之室左圖書而右
文史介然端坐奉養枯楊如高僧逸人士之以言語
自達者無間精粗靡不畢覽隆暑祁寒忍倦忘疲如
布衣儒生然則兩儀之間復何物可以惑我者非孟
子所謂富貴貧賤威武不能動莊周所謂焚大澤流

江海破山震海之風雷所不能變者哉擴而充之是為大丈夫歛而融之則為博大真人某不自虞僭議光明無所逃其罪

某草茅微賤讀書應舉其實為貧也當聖王勵精庶政某官器使群材之日得以文墨徹名於上冒寵不避退有愧懼繼得再到東閣道所以幸敢圖賜之從容如大賓客擇地除官滿適其意且謂純白可教教以有立某雖愚無知聞某官先生此言亦切自奮勵

以口語心惟忠惟孝惟恭惟謹庶幾萬一不負嚴訓區區感激不覺布露惟先生撫綏之

仰惟上帝篤生大賢以休息我國家元元十餘年來薄海內外父子兄弟得保天性禾麻菽麥各遂生理投我木桃瓊瑤報之人情古今一也矧億萬生靈舉入壽域此何從來哉是則無以報矣獨可無以致其誠乎茲者岳降之辰切為炷香薰心瞻南極之星誦千載之章而虔頌者無間貴賤人也群情如一上帝

臨之

竊惟盛德無私施及萬物天下樂推而頌焉者劫於情而感於中也某蒙被生成及茲愈豐矣既不能親舉壽觴切不自揆綴為律詩十篇引領鈞屏再拜以獻顧以一德格天福及萬方眉壽不害與宋無極豈特人言哉然其中有不得已者如前之云斐然而成突然而至不自知其言之陋也惟大仁人寬之某漸圖前去交割職事身在鈞鎔之下有命其敢不承

惟某官所以命

上丞相宮使小簡

王元長

某一介之賤輒犯威嚴僭易請問起居狀下情悚懼暑氣益隆共惟琳館宴閑神右賢業鈞候萬福某仰藉大芑塊處田野萬想滅矣獨於門墻未嘗一日忘也謹勒恭候

切以相公自去秋解機務之重從祠館之佚高標雅望超世絕俗仰惟襟宇日孟冲澹更覬順寒暑之宜

適興居之節妙理和俛以篤相門盛大之慶以副生靈之望

某中春走介寓咫尺之書塵溷記室日俟僭率之罪比其歸也伏蒙賜布帛之溫言寵桑榆之暮景雖王公大人謙尊而光顧豈疎遠疵賤所宜蒙哉伏讀竦然以榮為懼

某得請以歸深居窮僻未嘗與士大夫接其於時事可謂耳無聞目無見出入阡陌唯見田父野老衮

衣還廟堂致中興之事業以幸天下獨未知天意如何耳天聰明自我民聰明民心蓋天意也鋒車之召其在旦暮區區之私元所跂望

某居閑微祿不足以餬口豚蹄之祝蓋唯望歲而已久雨不止下田皆墮渺漫見者有填壑之憂連亘數郡如此正恐亦軫九重之慮也

上丞相小簡

晁子西

璇穹周迴協氣充塞共惟坐於廟堂兼運樞極王室

倚賴神明並相鈞候動止萬福某敬奉牋代其身賀
於堂上

邇辰不省鈞用何如聖賢相逢坐建中和之極當此
淑節更覺協氣周流伏惟冲粹集于神衿起居超勝
其在方內拳拳之情更乞盡消息理永享三壽之祉
伏聞丞相之印明天子久未有所付海內延頸日俟
顯冊之頒蓋踰年于此矣屬者恭審詔自中出告於
大庭卿大夫則相賀於朝士庶人則相賀於家乃知

明天子必待其知之深而後用之富公韓公之登庸
直如是耳某在遠不得從百執事詣光範門敢致一
牋於衮衣之前伏乞鈞覽

某名迹冗微不敢以書通於名公大臣而獨喜見東
南來者從之問名公大臣之賢東南來者皆疊疊談
相公頃在天官時吏不敢為姦而士大夫恃為津梁
已有廊廟之望矣今某與遠方之人自聞召還揆路
遂執鈞衡無不欣欣相告中外幸甚幸甚

某少經憂患異於他人重以才具迂踈不任當世驅使以此實無宦情願出任垂三十年無田廬可歸為貧所馱矻矻州縣間但知自治而已不自意猥蒙朝廷遽從支郡擢付一道而已蜀之俗喜為朋比以濶畧不事事為賢某效之則違其本性且負朝廷欲不效之雖民則喜矣其如官吏之不悅者衆朝廷皇皇不知所圖輒敢布之伏乞鈞察

上丞相小簡

汪彥章

初秋氣爽伏惟經體贊元均福中外陰有神明來護興寢某銜恤里居未有俯伏堦阼之期下情伏深瞻仰敢乞惠令節宣上承眷倚為宗社無疆之慶伏自違去恩地旬歲有餘雖日與陶冶諸生蒙被膏澤荷戴不貲其如身迹疵賤曾不獲薰沐脩狀仰布此誠茲者大賢登用海內同慶伏以區區犬馬之報越在遐方無緣陪士大夫班庭之末瞻望台閣精爽飛越

共惟某官以天與峻明之才加之聖人淵懿之學為
盛時而出必當大有施為利澤天下故方朝廷輔相
之典一新首膺柄任中外呼舞以數千百年太平之
期適當今日雖至愚不肖者亦將得其分願顧非木
石豈無此情緣衣制不敢具啟稱頌

某至愚極陋晚預簪纓之列奔走簿領乃分之宜不
圖先生過聽擢於眾人之中付以學校之選退惟僥
冒已無可報稱之理至於為親之故周旋曲折動皆

如欲雖使自為之謀不過如此罪逆顛隳受賜不終
然在荒迷中未嘗一日少忘感戴惟當痛自脩飾或
未隕滅尚期少效區區上答生成悚息悚息

某禍患漂零屏居饒之德興雖聞大賢當國田野無
知之民交口相慶緣地遠不克即布區區之誠惟鈞
慈特賜憐察

伏覩顯冊之頒曾未更時人心所悅和氣隨生風雨
協期倉箱萬計雖累然俟填溝壑亦知未至失所以

此感戴厚恩尤倍倫比

上丞相小簡

晁子西

比日始有清和意不省中台之光所照山川氣序何如伏惟赤鳥燕居倍膺冲粹加以神明協相鈞候動止萬福某守地不得詣行馬之前乞為天下未究之功盡消息理以須璽召

伏聞袞衣西歸凡鄉黨之士與嘗從賓客之游者無不迎於道路候於里門而某平日受兩世之知最厚

顧獨不得前豈勝愧恨雖再上牋牘終不能紓下情萬分也伏紙悚仄

某敢問久處衡軸乍還甲舍向來封植之木皆已成陰按行三徑景物增麗雖釋機務之勞就此閒暇固足以樂敢誦獨樂園之詩恐造物不我捨耳某敬傾耳以聽

伏惟門下翹材之館固應日盛日富而平昔得之於硤內者惟某與李捷為耳捷為尤答颯不振甚為門

墻羞近聞大為州將所苦且將就建極可念能為解
其急者非歸窮於門下不可敢亟以請儻軫鈞懷徑
從府庭遣一介致書於州將宜聽率爾申論皇悖

上丞相小簡

王望之

某僭易請問起居狀於記室不勝震恐已春寒色尚
凜即日伏惟總領百辟密贊萬機天人擁佑鈞候萬
福某杜門窮巷竊祿祠庭仰戴恩私誓不敢忘唯是
無路進侍下情惓惓某謹勒恭候

某蒙恩便私遂遠門墻愬風馳情唯劇犬馬之戀即
日不審寢餼何似伏惟默運神心調和元氣動膺百
順坐致休祥氣候暄寒未齊敢祈上副倚毗下慰其
瞻保合太和為宗社無窮之福

切惟相公以孔孟之道發為相業岩瞻聳然威名遠
播紹復中原萬物吐氣蓋有日矣唯佗褒陞槐鼎與
天下共慶

某哀謬叨冒政宜自竭而多病罷軟一毫亡補瀝誠

巧閑伏蒙鈞慈軫念寵以職名處之詞館華其老而
濟其私皆鈞播也某非木石豈不知歸儻未填壑筋
力可勉誓摩頂踵放蛇珠龜印之報神實臨之不敢
誣也
某臨行而詣朝堂府第竟不得望台光侍熒坐少叙
區區感激依戀之誠迨今負負未已也惟鈞慈恕察
幸甚

上丞相小簡

賀正

蒼精司候歲序肇端恭惟銓時論道天相忠勳鈞候
興居萬福某備數偏城仰託恩覆尚遙瞻拜門墻謹
修手訥申玷典籤

謹時申問之儀已列彛式東風解凍氣令尚寒不審
鈞履奚如鈞惟弼亮一人布德行慶共格龐鴻之祉
更乞重為社稷生靈怡神養漑逢迎太和下副輿情
之禱

元祚屆期三朔正始實上下交泰之辰品物咸亨之

際仰惟大忠碩亮輔行洪化德協日新高穹之所保
祐綿宇之所贊祈皆以君明臣良宜永膺于多福昌
熾耆艾萬有千歲豈特詩人能為魯頌哉門生下吏
實亦賡詠再三不知窮已傾依瞻禱倍越夷等
共以某官至德邁倫全才拔萃勲業蓋天地姓名高
日月求之往哲非阿衡周公不可為比當歲律之更
新諒眷懷之益厚格天威美奠枕休聲有識者莫不
以時稱頌非區區私情敢獨形於紀述者也

竊惟方今道洽政治歲阜民和囹圄屢空兵革不試
典章制度煥然與三代同風塗歌巷舞共慶海內之
丕平實自某官輔佐真主履中興之運隆不拔之基
感會天人宣明帝載以致其然某恪奉教條遵承德
意獲與邊遠郡氓同被惠澤其為忻戴未易名言逝
遠鈞儀荐更歲月雖駕蹇戀軒之情夙夜在念自惟
名分有間不敢頻貢柔函上瀆威重伏冀寬仁曲垂
恕亮

某綿力薄才重蒙恩造之加假守邊圉已書一攷雖不敢務為矯異之事以拂人情而仰賴亟覆黽勉恭欽昭布朝廷之德意致蠻獠向風編氓安堵使闔門百指溫飽自如實出生成之賜某誓將愈竭糜捐盡瘁撫綏庶逃瘝曠以少酬陶冶之私銘篆愚襟筆端莫究

某浮賤微蹤累叨獎拔雖贊論帥幕無所取材而付以一麾尤為寵異自顧僥冒之深悉歸外翼敢不銜

恩戴德以圖龜雀之報耿耿此心切祈洞鑒

某恐悖僭越百拜申問鈞閱寶眷恭惟履此新序茂膺戩穀

某皇恐武岡恐有驅委乞賜鈞旨

上丞相小簡 賀正

孟陽紀候四序肇開共惟祠庭多暇天相人瞻鈞履燕興万福某承乏偏城遠託鈞覆尚阻趨侍謹具手訥申候典籤

仰承寢饋之儀祇載右楮不審邇日鈞候何如欽惟
真宇恬然天光內發休祥之至密有相扶春令方新
寒飈尚勁更祈精葆粹和復登槐鼎以副四方之望
某官名高今古功在社稷雖退休外服以道自娛而
去就用舍為國安危當茲歲節更端陽德居內仁聞
召還廊廟再膺爰立以固珍圖式符輿論下情傾望
尤為深切

元正啟祚品物俱榮伏惟盛德履之自天膺祐殊慶
大來壽福之延何有紀極稱觴祝永填溢鈞門某以
官箴有守阻趨崇儀輒具短啟以伸祇賀之誠仰止
高山恨無羽翼

某才力凡下備數蕃宣仰荷恩德覆提兩見新歲其
為感幸未易名言更祈益賜推揚俾道訶譴瞻依之
悃仰冀鈞照

申問恩闕鈞眷伏惟中表共納純休國太夫人恭想
日有安問履茲新序福算駢增

上丞相小簡 賀正

熊子復

龍杓甫轉鳳紀載頌恭惟明良相須隱顯交相鈞候
動止萬福某猥縻漕指第劇岩瞻恭裁贊牘之辭仰
溷典籤之史

祇叙寒煥已扶彛戕欽伺夙宵用攄申禱惟真宰之
弼亮有明神之護持紫皇注心蒼生拭目茂臨新序
荐納多祺

歲筦肇新物華萌動猥拘七聚方攬轡而服勤逖望
三階阻捧觴而介壽仰鴻儒之揆道欽燕處之對時
仁風揚而發育無邊和氣薰而升平有象採諸輿誦
薦此蕪辭

恭以丞相器逾鼎重材極棟隆盛德格天昔既有若
伊尹殊勲闢國今豈無如召公鈞樞承兩世之傳膠
漆契千年之遇澤方霑於華夏績已燦於旂常何幸
親逢焉敢為佞

敬惟道德之門仁義之宇孤踪一別元朔再更屬外

絆於輕輶第遠輸於華翰昨屆履長之序嘗脩贊壽
之儀茲復揆裁併庸鋪叙

崇閣倚漢華族萃瀛肇逢萬寶之亨均迓百祥之集
內宅百揆固有成摹外慮四方豈無新約願承鈞諭
勉竭鄙悰

上丞相小簡

賀冬 七幅

熊子復

璿杓建子寶歷頒冬恭惟帝倚台衡神扶國棟鈞候
起居萬福某猥縻使傳逖望宰廷輒裁狂簡之辭式

叙勤拳之意敬馳單介仰控典曹

敬頌啟處甫贄彛儀欽贊節宣庸申虔禱仰惟一相
之揆道倍擁百靈之薦祥正笏垂紳重茵列鼎上體
九宸之眷下符四字之瞻永贊珍圖益綏繁祉是誠
真禱非敢過諛

景至測圭陽來浮琯洪鈞一氣已潛復於黃宮泰階
六符正炳連於紫極某屬拘塵鞅阻奉椒觴願閣真
宰之規摹益壯太平之氣象惟易明剛長之序是謂

得時而詩存難老之章尚歌為壽熒煌甚邈悃幅奚
殫

恭以丞相正大有容直方無撓自出膺帝簡岩岩早
峻於師瞻違再秉國鈞挺挺益彰於祖烈當綜覈厲
精之治有彌縫藏用之功譽處益隆頌難極

拜遠階符侵尋日月仰高墻伋間阻山川每戴惠於
岩廊屢控忱於竿牘適居迎長之序用虔修慶之儀
聲雖成文言莫盡意

竊以漕總七閩疆連二浙起孤踪之閑散付隆指之
將明深懼踈庸上辜臨遣惟賴併懍之庇尚圖毫髮
之裨搖筆怔忡伏紙惶懼鈞聞星辰之眷諒皆擁於
休祥閩封山海之區恐尚煩於約束鄙心敬祝綿力
願宣

上丞相小簡

賀冬

六幅

熊子復

杓占朔易律兆陽回恭惟帝眷宗工民瞻元老鈞候
起居萬福某謬膺轉輓幸蔭併懍瞻衮烏之未遑冀

鼎茵之加嗇拳拳是禱髦髦奚殫

拜遠階符時既多閱仰高墻仞心弗少移比叨六轡
之來喜際五雲之近屬簿書之繁委愒日方縻加原
隰之阻脩趨風未果雖嘗裁於尺牘曾莫述於寸懷
何當款侍熒煌歷陳悃悞引毫思澀伏紙神馳

伏值迎長之序合躬展慶之儀緣拘絆於冗司阻贊
持於壽筭仰止台衡之重履茲陽律之新即還秉於
國鈞用益調於帝綽使萬彙沐太和之澤而千齡膺

難老之祥敢竭此誠敬為是禱

某誤由閑散起畀將明維此七閩介于百粵何幸使
華之輶傳乃依宰鉉之鄉關雖綿薄之亡堪尚芘存
而得免顧輝之甚厚宜感鏤以奚窮

冬序凝嚴相閑邃靚仰蓬瀛之眷集蒙岳瀆之護持
萬慶日新百祥川至

閩封物夥漕局事繁豈無閒燕之需或有丁盜之戒
願聞鑄喻乃見鈞憐

上丞相小簡賀冬

劉夷叔

朔律戒嚴寒飈彌勁共惟宰正百官儀刑四海蓋載
薦休鈞候興居萬福某備員遐圉仰託雲麻尚稽瞻
拜鈞庭謹具啟申塵記府申候養寢之儀恪寘右楮
未審比辰鈞履復奚似緬惟運動樞極變化人神叶
氣嘉生永膺純祐當陽剛來復之辰更祈益體眷隆
妙毓神觀式副寰宇具瞻之望卑悰傾祝無任拳拳
某官員問世之才茂經邦之畧名齊嵩岱勲耀鼎彝

自昔宗工碩德翊贊中興輔臣平治未有若斯之盛
者實社稷無疆之福生民莫大之幸當今序之復臨
諒大忠之益著垂芳典冊固將與霄壤同為不朽區
區稱述蓋採之輿議仰乞鈞慈俯賜矜察

竊惟盛德大業超冠今昔固非小智寡識所能窺較
然考之時事則風雨調適稼穡豐成獄訟空稀干戈
偃戢群生和而萬民殖而亦足以見格天之效休祥
滋至矣某仰荷鈞播每與黃童白叟共歌化日之舒

長未嘗不慷慨歡呼以幸逢於華旦也
一元肇啟萬彙潛亨恭惟某官道與時行德膺帝祉
上協岡陵之固下霑動植之繁簪履稱觴歡聲騰沸
某拘縻恪次祇畏簡書無階躬詣鈞庭徒深傾祝謹
修尺牘少叙微誠敢祈鈞照

聖宋名賢五百家播芳大全文粹卷九十五終

聖宋名賢五百家播芳大全文粹卷九十六

疊幅

與張參政小簡

孫仲益

伏自執事參秉國鈞凡絲粟毫髮之才皆蒙收用如
某門墻舊物當是爐錘中受賜一人之數而獎用過
當非意所及重勤誨飭恩言慰藉勉以造官即日航
湖襍被而行尚欲策磨朽鈍以效一割之用而力小
任重不可負荷必至顛隕以孤任使伏紙占謝以愧

以恐

時事多故更用大吏視之殆不如棊也參政自結主知進登三事倚注之重度越諸公靖康以還一人而已側聞淮寇眾散而歸宗社再安鼎司虛位當屬元勳即聽非常之聞以慰天下之望

某愚暗自用屢觸怨咎投閑置散乃分之宜參政念一夫不獲之辜必欲滌除瑕垢復齒於搢紳嚴詔初下亟上免奏率意之所欲言止欲感動上聽而言狂

意拙不悅已者又復醞釀以為大罪以參政秉造物之柄噓枯吹生而某頭方命薄動輒得咎莫如解去全璧而歸區區之心方俟朝夕投誠上訴

與參政小簡

王元長

秋氣淒清共惟釣候動止萬福某承乏宰屬賴雲蔭雖未以罪斥而門牆緬邈無從趨侍僭易詞問記室某屬者數以竿牘仰勤聽覽正恐犯分獲罪左右鈞慈貶損必賜誨飭以故區區之私每不自安至於感

戢榮施又非一言所能了也即日不審鈞用何似風
露益冷敢冀妙理冲和歸侍冕旒發揮賢業使生靈
出塗炭之中躋仁壽之域蓋天下之望也

某衰晚疎拙方欲丐歸田里未及下手而丞相已去
矣孤迹廟堂既無相知又言者攻呂似未已不知如
某者得全璧歸否四顧茫然無所控告欲望鈞慈惻
然以一書為席參言之使得一在外遠闕待盡山林
其為恩造何翅生成之賜也特桑梓之末輒忘僭易

惟參政留念幸甚

上參政小簡

賀正

于子儀

蒼精司候歲序肇端恭惟弼亮公忠天人參介鈞候
興居萬福某代匱偏城仰叨雲蔭尚遙參拜鈞堦謹
具柔訥申詞記府

謹時申問之儀祇載前楮即此東風解凍氣令尚寒
不審鈞履復何似欽想翼宣盛美道茂經綸戩穀之
繁明靈默贊更祈重為社稷生靈精調茵鼎下符傾

祝之勤不備

元祚屆期三朔正始實地天交泰之辰品物咸亨之際仰惟大忠碩德輔行洪化遐齡景福山聳川增下寮傾頌尤為切至

某官躬久大德業之資當盛旦昌期之會備摠妙蘊佐佑聖神變化之勲加被草木岩瞻之望簡在宸衷仁聞榮陟元台輔隆洪祚卑情不勝祈向之切

歲律更端椒觴稱壽茲為彛禮今古所同遠想簪履盈庭冠蓋旁午某以拘縈吏役阻造鈞門輒憑毫楮以代慶儀仰乞矜察

某疎逖庸微邈在邊圉仰視大府潭潭何啻霄壤前此不自量分僭貢竿牘以為升辰之慶逮茲元旦復拜緘封蓋以懷感德誼殫布悃悞不敢自後於輿人冒犯之愆仰覬原貸

某迂愚下士夕荷函容黽蕃宣苟逃譴斥感銘厚德實倍常倫更斲包匿荒垢俾獲保全依禱之私非

言可既

上參政小簡

李久善

冬律居中朔風凝凜恭惟協贊政機天錫純嘏鈞候
燕興万福某遠託幪覆尚稽瞻對履約謹勒手啟申
塵記史

載詞寢餼之儀已列前楮比辰不審鈞履何如緬維
寅亮天工休有神相茂集繁祉七日來復万寶潛萌
仰祈上體眷懷精加調衛以副中外之望

某官以宗工鉅儒經綸之業贊襄黼宸勤勞王家弼
成至治宸衷眷厚右揆久虛位聞渙號之行別條賀
牘士夫之論罔不同之竊觀比載以來三光全而寒
暑平五穀熟而民人育道洽政治上恬下熙叶氣橫
流頌聲並作蓋由同心協謀彌縫輔贊以共成不拔
之功某承乏偏壘得與遠方黎庶鼓舞化鈞不勝欣
幸之至

星回昴陸化日肇舒共惟某官道與時升百祥萃止

某限以拘守官箴阻趨墻仞第勤傾頌之誠輒脩慶
削上浼典籤伏幸鈞察

某一介寒微仰荷埏埴雖瞻望崇墉執隔天壤而傾
依戀慕之誠夙夜無已自顧孱微宜安薄分故不敢
數貢柔絨以狂取僭之罪引領鈞墀恨無飛肉

某才韻枯梗無他技能久竊誤恩分符支郡實賴鈞
造包含未歸司敗私衷感戴未易名言更冀盛德優
容益垂覆庇卑悰無任依歸之劇

上樞密小簡

毛伯穎

冬序凝凜共惟參翊化鈞樞機周密威名武震折衝
萬里鈞候動止萬福謹具啟承候起居

某官道德謀謨經綸之學遭時艱棘纓冠授任威謀
勲伐震動海寓社稷所賴氓庶具瞻伏乞保御粹和
永膺多福

伏以妖氣未靖獯醜尚汚中原主上憂勤緝熙紹開
聖緒信順休治天人參助賚茲碩輔同心同德廟筭

先定克集大功恭惟執事維綱調度指蹤制勝萬全
之舉近在旦夕搢紳傾頌咸願舐筆和鈇鑄勒金石
以追歌詩誓命之盛天下幸甚

某官以儒林宗匠登翊聖明運動樞極傳說旁求俊
人周公降禮海內人士莫不願輸肝剖膽自效於樂
育鑪錘之末而某卑飛榆枋靡眇速蹇何足以辱執
事之顧盼然竊意洪鍾虛受無求不應區區悃悃當
蒙矜照

某建炎初蒙召赴維揚行在與丞相張公比牒併名
出入於黃丞相之門才疎命薄所向跋躔桑榆頽迫
俛仰無成切感某官以宏材高誼振拔汙險之中疏
遠寒雋無不嚮風慕義是敢飾其固陋願自附於樽
櫨侏儒之末共惟兼取兼蓄之度有以財幸

切以書生事業卑陬寒冷方時艱難賢哲馳騫賽裳
濡足惟恐不及而摩研編削之技將何所施但竊伏
執事之下風嘗獲誦詠遺編墜藁沾飫於殘膏賸馥

者久矣是敢效古人執贄之禮錄其不腆之文獻諸
黃閣下伏惟陶冶大公無棄金遺土辱磨汰而埏埴
之幸甚

某人微地寒越在別壤於執事之門無葭莩鴻毛之
重而率爾狂言犯分冒恥自通於記室以流俗之見
言之亦可謂不思之甚矣然竊意執事方以瑰瑋奇
傑之度旁搜遠紹進用貧賢孤士以復古道以振流
俗之際終不以其踴躍不祥而賜棄絕用是自決若

執事辱幸教之亦市駿骨致千里馬之義也干冒鈞
慈無任戰越

上韓樞密 宮祠

王季高

申問起居粗如常禮庚伏炎敲共惟琳館晏閑神右
勲業鈞候万福某竊祿祠館杜門窮巷末由瞻望履
舄遡風馳情不勝拳拳謹勒參候

自錫邑津亭請違倏焉秋矣疎遠疵賤亡路擁篲以
待門墻即日不審鈞用何似暑氣正酷敢覬調護茵

鼎保合太和以篤相門盛大之慶以副海宇之望
切以樞密端明聲名風采實魏王是似至於奮然不
顧遠使強虜其為忠義近時士夫所未有也扶顛持
危正賴柱石今乃解樞筦之重從祠觀之佚然鋒車
之召其在旦暮乎願戒舍人束裝以待某宵中索然
亡髮毫可為時用者獨樞密存錄獎拔蓋三十年矣
而某頑鄙倍費鑪錘之力樞密刻意成就久而益切
顧惟此恩何以論報虺珠龜印冀之異時而已僭易

死罪

上沈樞密小簡

毛伯穎

春抄暄潤恭惟運動樞極嘉言孔彰折衝綏遠之謀
海隅蒙賴神理聽勞鈞候動止萬福謹具手啟申問
黃閣

恭惟某官以全德上賢譽處隆治誕敷典冊入踐樞
機宥密之地伏想綸言誕告公門省戶之間縉紳喁
喁罔不欣籲某素荷知眷迭聞褒詔切深抃躍

伏以某官道隆德駿見遠識微爰自翊宣萬幾羽儀
表著聲猷軌訓之懿海內誦之今者光被贊書再登
政路實將闡融勳績嘉靖萬邦仰冀畚神養和愈茂
棟隆鼎飪之素

伏聞某官促駕鋒車入覲宣室懋膺華光講勸之重
尋具尺牘附致悰悃伏想已關眎覽惟是睽逖誨範
歲月滋久藐在遠服壅蔽朴愚瞻仰階符但增悃抱
伏以皇武鷹揚執敵震駭主上圖任者俊惟清緝熙

用丕顯祖宗之休命某官以舊德元勳荐登樞近恭
惟經文緯武職思其憂竝觀咸劉式遏之功混一區
宇垂副具瞻之望

與樞密小簡

氣候漸熱伏惟從容右符神明其相之鈞候動祉萬
福末緣參承切冀若時保重倚須大拜

違去熒席雖涉日未久區區景慕若隔年歲向非親
誼周全至厚詎能使人拳拳不能忘如此憑書引領

愈切依歸

伏自擢司本兵之地即捷奏無虛日制勝之策何其神速若此耶惟間下至誠樂易其心休休焉蓋古之常人吉士非邇來縉紳所可及也當坐廟堂謀謨天下庶幾厚德以鎮浮卓行以善俗一變近世澆薄之風則智名勇功特其餘事耳

屬者獲依大庇苟祿數月亦已幸矣既已丐閑得請俾遂山林之性此意豈可忘耶今茲翳迹華門寂無一念時以扁舟草屨放浪田里中儻未捐棄或以餘光掖之固所願也非所敢望也

上樞密小簡

賀冬

黃鍾紀律氣令凝寒伏惟運籌樞府天人交相鈞候動止萬福某孱瑣微蹤遠依悒茫尚稽參拜赤烏謹勒狀冒塵典記

修詞鼎茵之儀恪具彝式邇辰不審鈞履奚若緬想惟忠宥密贊計廟謨休慶之來百靈攸介天元肇復

庶彙潛萌願言咀調道粹消息時宜以副海內黔黎
之望

某官偉才名世妙識濟時簡在冕旒擢專樞柄奇謀
碩畫遠邁古人輔贊彌縫實惟明哲行觀大拜以快
輿情卑棕祈嚮之切

竊惟方今華夏乂安四方無侮兵革偃息百姓救盜
蓋由默運韜鈴折衝海表故治效之著如此其盛某
備員遐圉得與士民同其鼓舞實千載一時之榮遇

忻幸之至倍極愚衷

書雲紀候愛日初長恭惟某官道協剛明福祚蕃衍
某限以官守拘牽莫獲走慶鈞塔徒勤祝頌輒修尺
牘以露微誠仰乞鈞慈俯垂眈照

某疎遠孤蹤仰賴洪廕得以效能小壘瞻望鈞庭邈
在雲漢自顧分守有等不敢數貢柔亟上浼聽瑩惟
傾詹戀慕之誠無時或替敢祈鈞察

某浮賤之資濫分符竹秋間已遂書考政藉鈞庇之

宏得免曠瘼卑情豈勝感刻更覬至仁兼愛益賜包
荒俾遂安全誓將疲精盡瘁以酬恩覆依戀之深仰
丐矜念
申問鈞閱瑤眷伏惟上下各擁純休
某皇恐下郡恐有驅策乞賜戒約

上韓郡王小簡

賀生長

蒼精司候歲序肇端恭惟琳宇燕清天人參介鈞候
興居萬福某代匱偏城仰叨雲廕尚遙瞻拜鈞墀謹

具柔訥申詞記府

謹時申詞之儀祇載前楮即辰東風解凍氣令尚寒
不審鈞履復何如欽想優游祠館忠槩益彰戩穀之
繁明靈默贊更祈重為社稷生靈精調茵鼎下符祝
頌之勤

元祚屆期三朔正始實天地交泰之時品物咸亨之
際仰惟大忠碩德茂對昌辰福祿綿永卑情瞻頌實
倍夷等

某官奇謀妙畧素蘊胸中茂烈殊勲久揚閭外功成
勇退恩寵益隆雖頤神奉祠坐享封爵猶惓惓不忘
帝室之大計忠義之節夙無前比伋觀進躋槐鼎積
考中書以久協於師言幕府舊僚祈嚮彌切
比辰候屆三冬蕙收九葉既歲功之已就實春令之
將臨天於此時誕生賢帥英資偉質超冠等倫宜其
夙奮忠謀結知黼座扶持王運茂著元勲壽考之隆
固將與寶祚同其久長欽頌之情毫楮莫既

某孤蹇微蹤久蒙獎庇恭逢降岳令辰及此新節當
躬造崇墉廁賓屬稱觴之列限以職守攸拘不克如
志輒以星香末禮及祝䟽慶函冒塵熒座敢乞鈞慈
俯賜鑒照

某迂愚下士備數蕃宣獲道謹訶實由恩覆更覬盛
德愛人益賜提携俾安於終始瞻依懇切彌激懦衷

上韓郡王小簡賀冬

冬序向深寒風加勁共惟棲神真館天祐忠勲鈞候

興居萬福某仰切雲廕末由瞻望履綦謹拜手干冒
典書

申候記史已列前楮邇辰不審鈞候復何如緬想玩
道祠庭密扶宗社休祥之行山聳川增陽氣方亨氣
候凝凜切祈勉躰眷懷精調鼎飪下慰傾祝之誠
某官以雄才碩量為國宗臣功在王家芳垂史冊用
能顯膺茅土茂對龍光身名俱榮超冠前列暫茲均
逸琳宇益著丹誠仁聞正位上公以福天下

亞歲令辰有生同慶共惟巨德履之戩穀駢臻某祇
畏簡書拘於職守不皇趨廁賀客之後塵徒勤傾頌
輒修短牘以露愚惻仰乞矜察

逖違熒座荐易星霜鄙心傾馳無日不在墻仞吏事
倥惚不獲時拜柔函第深悚愧伏惟鈞仁俯賜恕亮
某駑鈍之質假守偏方實自獎拂之素每思夙夜恭
勤盡心綏撫以仰稱於知遇感幸之私無以為喻
某碌碌無奇徒勞小壘遠賴廕樾苟免曠瘝已書兩

考更覬盛德始終提掖不勝至幸瞻跂旌戟志往形留

上陳太傅小簡

季秋謹時伏惟道隆德重勲業赫奕社稷攸繫神明相輔鈞候動止萬福某服力職事不敢上煩賜念謹奉啟上聞

區區上承候問之禮敬布右楮邇辰不審燕申餘暇鈞用何如伏乞仰副宸衷禮眷之渥寶練沖和某傾

頌

某疎逝之跡伏自一違鈞閣屢更歲籥岩瞻景仰不勝下情某拘絆天涯末緣參省但深依歸戀慕之誠某微賤無取引分自慊不敢輒修竿牘塵污几閣恐速僭越之罪仰惟鈞度容涵末賜譴訶下誠幸甚恭惟某官協德位師端誠考古功名終始深契禮經惠澤元勲四海蒙福天錫難老永固壽祺天下幸甚某孱鈍奇危一介之賤承乏鄉部閱日滋久無補事

功方虞敗黜茲蒙朝廷以某芟艾狂卒叙錄微勞責
以宸章進直龍閣飾之魚紱就參漕計寵數便蕃踰
涯溢分內視缺然有此遭遇以榮為懼實惟鈞造曲
賜甄收噓枯吹生自卵而翼天地父母之恩恐未致
是某感激幸會豈敢須臾以忘道阻且長無由趨詣
鈞屏侍面以叙謝下情無任悚恐之至

某人微望輕智疎術拙蚤被眷憐得預使令之末已
為莫大之幸仰承恩數遂使綿薄而摠繁劇冗賤而
陞清華出於覬覦之外非所宜蒙曉夕恐畏如臨淵
谷誓當殫思畢慮竭盡駑力庶幾無辱門墻而已
某本路恐有驅使事件乞賜鈞喻願效犬馬之力
鈞閱寶眷伏惟神示相佑坐擁休祥

上劉太尉小簡

問訊起居狀於記室之史頗涉僭率殊深愧惕春寒
尚凜恭惟總領大軍紀律嚴整神明依護福祿駢集
竊祿祠館末由伏謁幕下朔風馳情謹奉狀參候

某承乏行朝每荷優遇比者得請而歸更勤飲餞區區感戴未嘗少忘即日不審鈞候何如氣候暄寒未節敢冀為國家眷賴倍加調護以副天下之望某還家幸四境亡虞得以偷生田野皆出大芘敢不知幸但乍歸一番應接擾擾無少暇以故不即寓狀起居其實於左右未嘗不卷卷也

舍弟於門墻雖昧平生伏蒙特達許辟置帳下刻骨感藏更望留念早賜成就幸甚浼瀆聞聽伏深愧懾

與劉太尉小簡

即日凝寒共惟鎮撫豐暇神明協相台候動止萬福某遠託恩庇末由參覲伏冀為國自重

某違去旌幄于茲累年下情傾仰無物以喻一行作吏救過不暇追數初心每用慨嘆何當躬詣帳下盡布此懷臨書重增悵望

昔歲卧病上中伏聞登壇受鉞之寵扶僊占辭因一叟兵為慶迄今不返其浮沉殆不可保比遣使臣護

網至鄂渚再上記頗詳悉伏計已塵台几感念恩義
有不能忘者不在書疏之疏密爾尚幸孚照

某偶以宣威之檄分校特奏各進士于成都用四十
日始得歸中途下拜因永康所賜台翰跪坐以讀恩
意慈祥寒屋為暖薄莫就道傍僧舍取火作記未謝
萬一溢深感愧之至

某資中方報代已蒙朝廷記錄繼下沈黎之命顧何
以得此不敢忘所自也重增感愧然某衰病益侵行

挂衣冠神武門下與草木同腐矣平生相知如公無
幾輒布苦懷臨書悽斷

台眷上下均慶有役願受令

上王尚書小簡

員顯道

朱夏謹時仰惟崇深禁掖武部雄特職穹地峻神天
扶贊台候萬福某謹專勒記上詞興居

某中悃之誠右牋已悉比辰暑意漸盛仰惟師長百
僚羽儀萬化賢哲所介擁祥時万益壽而臧伏丐妙

用冲和永為王室依賴下副宇縣傾系之切
某仰惟某官誠明之質温厚之文二者皆粹然不雜
所謂黃琮白璧天地之器南金東箭湖海之望嚮者
屢試藩符鈞勞外府然汲黯寢謀望之雅意自當為
本朝之重迹者黼宸所以深思旌車所以亟召先畀
舊物行秉元樞旦夕真可踵而須矣匪佞

伏覩制書以禁掖之任仰屬盛德百全之英誠足以
施六藝之明效分九品之清濁縉紳君子與夫蓬茅
之細民間命之日皆歡欣鼓舞引首南望恐除拜之
緩也更祈養望台衡遂熙庶政則山公品題毛玠雅
亮皆不足列於大君子之前矣

某區區一介力劣才下鼯鼠五技駑馬千駕深虞不
堪世用今者恪將使事遠蔭悒悒逖觀盛時登進良
輔俾無庸者得依洪庇與萬類同慶誠夙昔之願也
感憐之懷臨紙無極

上尚書小簡

夏令云初炎蒸漸劇仰惟典正七曹鼎來萬祉神天
協贊台履動止集福某謹勒記上干典籤

比辰星迎東井風起南薰不審台座日用何似想惟
濯纓清塗視草禁掖兩有勝適更乞妙護一節即正
三階下情企禱之切

某官富文篤學燭理明道冠藝於南宮藹譽乎西蜀
令聞令望表暴一世名流勝士殆未可跋而及也五
兵要職八座崇班蓋聖王姑示優賢之寵然超除特

拜未見其止側耳白麻之宣黃扉之入匪昕伊夕也
不誣不佞

切惟 國家隕福生靈兼愛南北則繼好息民折衝
樽俎當有人焉今執事踐揚中外閱天下誼理甚精
且久則附近懷遠之術勝殘去殺之義非執事其誰
茂明之

某寒蹤衰退遠塵使節旣聞德望今聆顯拜益喜庇
身之有地也方墮萬里外不任進伏兩階乃情依依

耳

上尚書小簡

春律更調共惟玉立朝端神祇昭相台候動止萬福
某備員戎幕苟安分守乞不垂念矯首門下晤對邈
未有期伏祈養無害之剛成不貲之福俯慰中外之
望

某邈遠台儀倏兩易歲惓惓高誼鑒寐不忘卑棲冗
局略無少休念念拜起居之問迄今未果尚期大人
君子曲垂包容寸毫尺楮言不能叙

共惟某官經術文章師表一世以八座之重進讀經
筵兼職翰苑自昔儒者逢特之榮何以加此然薦紳
之談尚以未究施設為慊况某受知素厚者其私用
延跋宜如何哉即聆大拜慰此遐瞻

上秦大資小簡 賀冬

冬律方中祈寒彌盛共惟提總蘭臺納忠文陸天人
介相鈞候興居萬福某備數遐取仰叨恩覆末由參

拜鈞墀謹勒手誠申涵典記不悞
申詞茵鼎之儀祇具右方邇辰鈞履復何似伏惟游
情圖典神祐博碩哉穀之來日加繁衍一陽換節朔
吹方嚴更祈惠令節調輔隆景祚以慰生民之望
仰惟某官英才妙蘊出類離倫名高斗南望隆人傑
故能擢巍科隆厚眷峻躋政府網舉圖書輔成緝熙
光明之美勲德兼盛萃於一門考古驗今未有其比
是宜延保宗社流慶無窮超越乎揚公四世蕭氏八

葉輿議攸歸非某敢佞

天元肇居動植咸亨緬惟碩德履之茂膺純嘏某以
拘職遠方不獲走廁縉紳獻箚之列輒藉毫楮以摠
傾頌之誠伏惟鈞仁曲垂矜亮

伏自拜違恩閱三更歲籥感戀之深發於宵寤實念
雲泥勢隔不敢頻以竿牘微禮冒玷典籤仰覬鈞慈
察其非懈特賜原貸

某坎壈微蹤久荷甄播叨竊承宣之寄雖偏方遐徼

夷獠錯居自昔號為難制而遠賴朝廷威德莫不革
心向化以故柔良樂業得以安其愚拙舉家飽煖實
出鴻私感激形言曷殫愚悃
某資品凡庸濫膺符竹勤勞綏撫已越暮年自非恩
門覆護曷免譴尤鏤骨銘心誓酬大德更蘄鈞造加
憐始終全庇下情依戀不勝惓惓

上張徽猷小簡

春序劇暄物華滋勝太平和氣海宇翱翔共惟志茂

經綸術恢康濟精忠許國膏澤在民神之聽之百祥
來舍台候動止萬福謹再奉手啟布起居不宣
邇辰鈞惟雍容轂下步武廷中謹論贊襄宏謀啟沃
均調國論協濟化工密勿進思優游退食天人參介
福祉川增更祈上體眷懷俯從頌詠保綏饗寢忘嗇
冲和倚需大用

竊惟綵衣侍膳日奉鈞顏温清問安門闌多慶某一
麾匏繫數仞雲高渴奉羽儀第深景企拳拳鄙素筆

墨奚殫

某仰惟道學資深淵源浩博代工之業夙稟生知熙
載之謨率由自得巖途穹峻拱持宸旒倚注方隆眷
毗益厚渙恩異數輝映無前廣譽英聲飛騰天下縉
紳咸慕豈特區區

某近被上恩再司戎律黜幽是懼乃進官聯受命拜
嘉汗顏殞越俯惟孤逖曷稱使令茲蓋某官惻憐陳
舊推借迂疎特達之私未知報塞某伏思燕南趙北

黠虜殊鄰必擇賢臣付之閫寄干城方畧禦侮內視
缺然益虞訶譴徒悞獎知旦旦省循曷勝戰

慄

某濫乘一障遽閱三秋上賴聖算授成天咸宣暢廟
謀制勝堂上折衝烽燧銷沉御杖靜析其如碌碌第
守平平加之疾急侵凌繭然老境嘗攄危懇輒丐投
閑比捧銜封驟頒綸告臣子之分莫獲循墻然而某
旅力既愆素飡尤甚支離受粟實不遑寤久沐眷憐

諒蒙記恤

某上問台閔寶眷伏想順迎援律茂集春祺
某此中有委願效驅策

與陳侍讀小簡

燕閑豐暇台候萬福某病即林壑末由占見尚覬為
國自重

起居狀比復何如益冀齋疾自謹再極文章禮樂之
選下情欽頌執事進退異常譬之堅車大輿非有所

却不能至也一宿留則弭節緩轡於禁塗矣
凌雲之別已墮夢境出處喧寂不同書疏兩絕念之
慨然有懷種種非索言不盡

某初心舊學槁落盡矣下執事哀之以華緘妙語鼓
氣健讀恍覺神觀復還也幸甚過望扶憊占詞未謝
萬一

與胡待制小簡

孫仲益

過都一望履約禮遇益厚而以忽忽就別不獲奉周

旋為恨日俟召歸郊見以盡餘懇
伏審寵還外制未敢為門下慶聖主圖舊示大用之
權輿黃閣紫樞自此超進區區慰喜非朋友之私也
迫於嚴詔襍被造官疎庸拙於用大已再具奏控免
所冀聖主哀憐放還田里以遂魚鳥之性自內庭入
輔非公而誰

與莫吏部小簡

某罪垢眾所鄙遠首蒙車騎踵門存勞甚寵一復感
著道路之流離彌時方有息肩之地占謝不敏伏希
亮察

新命登冠六卿除書傳聞顧以遠外不果陪附賓客
下陳一贊左右之喜尚冀珍攝以需大用

據案之初訟牒紛然皆數政不決之訟而因循流弊
又性所不樂盡索案牘寘一室中時時省閱之吏詐
民寃如辨白黑甚有可樂者但塵容俗狀已稍見於
眉睫它日復得相見定非故吾矣

與陳寶學小簡

不審起居復何如前輩舊德惟公一人益冀珍嗇以副大夫士歸重之意

違遠熒座一經星矣中間多故書疏不登凡閣之下但增愧歎其於忘年左顧之恩尚朝夕念之伏幸恩照

某與下執事書疏往來小紙博封舊矣輒占辭作牋板俗下之禮有未能去者伏幸洞照

上樓學士小簡

某孤陋無取人所棄絕過而不問獨蒙獎眷弗替疇昔因獲登門墻聳聞訓餘懷感恩德殆無以為語即日炎溽可畏恭惟密侍黼宸明神護相台候萬福竊冀葆光佖迎柄拜奉拳不宣

某官以備道遠業上簡眷衷踐揚華要尚茲綿厯末副四海具瞻公議鬱鬱佖膺蚤莫登拜入參揆席大福天下豈特門闈最爾永有依歸不勝祈懇之至

答侍講小簡

孟春謹時恭惟道尊德隆神天拱護台候動止萬福
某仰託華庇末緣瞻對伏冀嚴衛威重永綏斯文
某僭候興居既公牘謹矣邇辰元正肇啓氣候澄清
不審神觀何如敢於使人問興寢切知衛生有經萬
有忻慰得台候無恙為清朝綱領為斯文東道主此
豈小事也

恭惟某官以一代文伯如唐韓柳氏上方偃武右文
登用俊傑人如執事合位要津某游東南無問貴賤
皆有此言某不佞亦不敢欺潤澤蒼生定在朝夕與
在陶鑄可見此心

某誦執事之文願摳衣下風既有年矣疎賤僻陋無
路自效今者使人數百里一旦扣門墜之雙絨明珠
大貝舉以遺匹夫某何堪此賜但傳之友朋以為耀
耳

某不腆晚生得與諸儒至於庭上不以其言論朴拙

擢之首冠山林鄙野非真宜稱也實惟鄉先生台光之所照臨某不敢自私尚容趨伏墻仞敷露此懷

聖宋名賢五百家播芳大全文粹卷九十六終

